

«Աղբար, քիչ մըն ալ ժողովրդին մտածելու է»...

* * *

Քաղաքացի Մարկոս աղան եկաւ, գնաց, այցելեց Լենինականը, բարձրացաւ Սեւանայ լիճը... «Պորճրդային Հայաստան» թերթը ամէն օր տեղեկութիւններ է տալիս: Գրում են նրա տպաւորութիւնների մասին, նրա ծրագիրների, նրա տուած յոյսերի:

Մարկոս աղան ներկայ է գտնուում Գործկոմի նիստերին, ուր շատ լուրջ եւ այս առթիւ չա՛տ գործնական վիճաբանութիւն է տեղի ունենում: Նա անդամ է զանազան մասնաժողովների, օգտուում է պետական ինքնաշարժներից, խառնուում է բոլոր գործերին, ձրի հին կոնեակ է խմում, ճառեր է արտասանում, գեկուցումների կապոցներ է ժողովում, խոստանում է, խոստանում է, խոստանում է:

Երբեմն տրտունջներ են լսում: Ծեր մի կոմունիստ, նրա հարեւանը, գայրանում է: Այս սրիկան, այս խողը... Խեղճ մի որբեւայրի կին, եկել օգնութիւն է խնդրել, այս շան որդին լիտի առաջարկութիւններ է արել...

Չնչի՛ն բաներ: Գործ, դո՛րծ:

— Մարկոս աղա, Համալսարանի Փիզիքական լաբորատորիայի համար անհրաժեշտ են գործիքներ...

— Յուցա՛կ պատրաստեցէք:

— Մարկոս աղա, դպրոցները ոչ տետրակ ունեն եւ ոչ մատիտ:

— Բոլոր կարիքները գրի առէք:

— Մարկոս աղա, պետական թատրոնը...

— Սանկ չըլլար, մեծ շէնք մը շինելու է, հաշիւները ըրէ՛ք...

— Մարկոս աղա, ճահիճները չորցնելու համար մի քիչ փողի պէտք կայ:

— Քարաէս եւ մանրամասն տեղեկութիւններ:

— Մարկոս աղա, տրակտորները անհրաժեշտ են երկրի...

— Չեկուցում մը գրեցէք...

Մի օր էլ Մարկոս աղան վերջապէս որոշում է մեկնել:

Պատրաստում են թղթեր, յանձնարարութիւններ, Չեկայի արտօնութիւններ:

Հողժողովում շոյում է իր մօրուքը, ի նշան մեծ յաղթանակի, եւ վազում կայարան: Ծա-

ծուկ փսփսում են: Ողջեղբուկում, գլխարկ հանում, սիրայիր խօսքեր ասում:

Հողժողովում մտածում է՝ խաբեցի՛:

Մարկոս աղան, թաշկինակը վերջին անգամ շարժում է կոմիսարների առանձնաշնորհեալ վագոնից դուրս, եւ մտածում է՝ աւանակնե՛ր, խաբեցի:

* * *

ՈՐԲԵՐԻ ԳԻՒՂԸ

Ճանապարհը անցանք գրքի նման:

Խոնաւութեան մէջ թռչնած, հին գրքի դերին էջեր: Կան արատներ ու մգլոտած թղթի վրայ բառեր, բառե՛ր: Զգուշութեամբ բաց ես անում էջը ու աչքերդ վազում են վէպի ետեւից: Անկարելի պատմութիւններ: Ժայռի մօտ, աւրուած դէմքով մի սուրբ է աղօթում, շուրջը՝ փլած կմախքների փշորքներ: Մի բու՛ աժան բանաստեղծութիւնների անխուսափելի բուն, ապակիից, ներկուած աչքերով: Դեղին հիւանդութեան նման երակներիդ մէջն է մըտնում անապատը, ու աչքերիդ առջեւ ներկայանում են սայլի վրայ նետուած երախաների մերկ դիակները, ինչպէս տեսել էի մի քանի տարի առաջ, Երեւանի փողոցներից մէկում:

Մեր բոլոր գրքերը ահաւոր են: Թագաւորները երբեմն լոյս եւ աղամանդ են հագնում Արարատի նման, իսկ այստեղ, վարը, օձերը սողում են քամիներով ծեծուած աղբատիկ բոյսերի շուրջը:

Դաշտը փշրել է իր ողմնաչարը, վայր է ընկել երկնքի տակ, հեծում է:

Ձին դարնում է ոտքը գետին եւ գետինը խուլ հնչում է, հսկայ մի գերեզմանաքարի նման: Ձին ցատկում է մի կողմ, վախենում, խրինջում ու կառքի դլխին երկինքը, անհաստատ անիւների վրայ, երերում է:

Այսպէս, այնտեղ, տառապանքների երկրում, երերում էր մի օր խաչը, եւ ամբողջ աիեղերքն էլ իր հետ:

* * *

Եկել ենք Սարդարապատ: Անդլիացի բարեկամս, նախկին ցարական բարձրաստիճան հայ պաշտօնեան եւ ես:

Խնդրե՛մ ծանօթանաք — Որբերի Գիւղի ամերիկեան վարիչը, Քրիստափոր Կոլումբոսը Հայաստանում: Ուրիշ ամերիկացիներ: Դեռ ուրիշներ: